

qu'elles estoient baptifées, & qu'elles ne commett[roient] iamais de telles offences: Cela n'est-il pas étônant au pays de la barbarie?

Il y a vne tres-méchante coustume parmy les Sauvages: Ceux qui recherchent vne fille ou vne femme en mariage, luy vont faire l'amour la nuit, il y a bien du mal dâs ces visites, mais non pas tousiours, car les femmes Sauvages de ces quartiers font assez retenuës, craignant de ne point trouuer party si elles se rendent communes. Or pour exterminer vne si méchante façon de faire, nous recommandons aux filles Chrestiennes de ne donner aucune responce à ceux qui les recherchent en ce temps-là, il s'en est trouué qui l'ont tres-bien gardé, rebutans ceux qui les venoient visiter, iusques à nous venir prier de leur defêdre semblables visites, croyans que ces ieunes gens nous obeïroient plustost qu'à elles. D'autres leur disoient seulement ce peu de paroles; Allez vous-en trouuer les Peres, faites-vous instruire, & baptiser, puis ie vous parleray, non pas la nuit, mais le iour. Trois ieunes Algonquins de l'Isle estant descendus à Kebec, & voulât faire l'amour selon leur coustume, [56] s'adresserent à des filles Chrestiennes, ils furent bien estonnez quand ces filles leur dirent qu'ils s'adressassent à nous pour cét affaire, & qu'elles ne concluroiët rien fans nostre auis. Ces bonnes gens vindrent à la fin nous trouuer, & nous demanderent si nous gouuernions les filles Sauvages, au commencement nous ne sçauions pas ce qu'ils vouloient dire, enfin l'ayant conceu, nous leur fimes entendre que ces visites ne valoient rien, & qu'ils ne pouuoient pas pretendre d'épouser aucune fille Chrestienne qu'ils ne fussent baptifez. Si toutes auoient la retenue de